

Date – 15/09/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. CSS hnuaia thawk intelkhawm AMCECC-in lungawi lohna lantir chhunzawm an tum lain, Aizawl District Magistrate chuan Sawrkar Office awmna hmun hrang hrangah mi 5 aia tam punkhawm khapna a chhuah.
2. Pu Lalmuanpuia Punte MLA chuan Mizoram chu India ram bungkhat anih angin Mizoten Hindi an thiam a tul hle a ti.
3. Prime Minister Narendra Modia chuan vawiin khan Bihara Purnea district atangin hmasawmna project cheng vaibelchhe sing 4 man hu a hawng
4. Supreme Court chuan Waqf dan thar dang rih tura khinna chu a hnawl.

<><><>

CSS

CSS hnuaia thawk intelkhawm All Mizoram CSS Employees Coordination Committee AMCECC-in lungawi lohna lantir chhunzawm an tum lain, Aizawl District Magistrate chuan vawiin atanga thla 2 chhung Sawrkar Office awmna hmun hrang hrangah mi 5 aia tam punkhawm khapna a tichhuak.

Aizawl District Magistrate –thuchhuah tarlan danin tunlai hian Sawrkar lakah thil phut neiin pawl lungawilo, nawrh huaihawt mek an awm thu an dawng a, a hnuaia hnathawk ten harsatna an tawh loh chu Sawrkar duh dan ber a ni a, thil duhawm loh a thlen loh nan leh thlamuang taka Sawrkar hnathawk ten an hna an thawh theih nan Aizawl District huam chhunga Sawrkar Office awmna hmun hrang hrang Raj Bhawan, Chief Minister's Office, Mizoram Assembly Secretariat, MINECO leh a chheh vèlah sawrkar, politics, sakhuana, vantlang leh thil dang engvang mahin mi 5 aia tam punkhawm leh bengchhen khap tlat a ni tih a sawi.

Hemi chungchanga Akashvani Aizawl zawhna chhangin AMCECC General Secretary Pu Vanlalpeka chuan Mizoram sorkar laka lungawi lohna lantir nan naktuka MINECO open gym kawta sit-in-demonstration neih an tum laia Aizawl District Magistrate-in mi 5 aia tam punkhawm a khap tih vawiinah a puan tak avangin vawiin tlai khan an kal zel dan tur sawi hovin an thukhawm tih a sawi a ni.

AMCECC hian Mizoram sorkar laka an thil phut hrang hrang chungchangah thu lawmawm hriat tur a awm loh avangin lungawi lohna lantir nan tun thla September ni 9 atanga ni 11 thleng khan Mass Casual Leave an lo la tawh a ni.

Hetihlai hian, Adviser to Chief Minister (Finance & Planning) Pu TBC Lalvenchhunga chuan vawiina ZPM Party office-a chhung inkhawm an hmannaah thu sawiin, CSS hnathawk an dah ngheh theih loh chhan chu danin a remtih loh vang a ti a, dan chu zah tur a ni a, dik taka ro an rel theih nan an huai ngam tur a ni a ti bawk a ni.

<><><>

CM

Chief Minister Pu Lalduhoma’n India in kum 2036-a Olympic thleng tura hma a lakna kal mekah India aiawh thei tur Mizo thalai tam tak zawng chhuak turin Empowering Mizoram Sports kalpui mek ani tih a sawi.

Mizoram Rifles Association ten an thlen 12th North East Championship Shooting Championship, 2025 kharna inkhawm, Aizawla buatsaih a hmanpui na ah he thu hi sawiin Chief Minister chuan silai kah chu Olympic in infiamna zinga a telh avangin mi thiam, chher tlak an neih phawt chuan EMS hnuaiah chherin sawrkarin theihtawp a chhuah dawn a ti a, Shooting chu infiamna ngaihsan hlawh tak, taksa leh rilru fim tak mamawh chi, mi bikte tan a ni a ti a, hlawhtling taka hmarchhak bial huap inelna an thleng thei chu lawmawm atih thu a sawi .

Mizoram hian he inelna hi a thlen tum thumna a ni a, shooters 257 te chu state hrang hrang paruk leh services atanga rawn telin, Assam atanga lo tel an tam ber a, Aizawl khawpui chhung hmun hrang hrangah category milin an intihsiak a, A pumpuiah Mizoram chuan Gold 25 lain team champion a ni a, Meghalaya chuan Gold 24 lain pahnihna an ni.

<><><>

HINDI DIWAS

Pu Lalmuanpuia Punte MLA, Adviser to CM (political) chuan Mizoram chu India ram bungkhat a nih angin Mizoten Hindi an thiam a tul hle a ti.

Mizoram Hindi Prachar Sabha Office, Mineco-a Hindi Diwas (Hindi Day), a hmanpuinaah he thu hi sawiin Pu Lalmuanpuia Punte chuan Mizo tawng chauh thiam chu tih theih a tlem hle a ti a, NDA kaihhruai sorkarin Act East hnuaiah khawchhak ram te nena insumdawntawwna tur kawng pawimawh a siam, Kaladan Multi-Modal Transit Transport Project (KMTTP) chu nakumah Myanmar chhungah laih zawh hman a in beisei avangin hnamdang te nen in awm pawlh tak tak chuan tawng thiam tam a pawimawh hle tih a sawi a ni.

Byte: Pu Lalmuanpuia Punte

Pu Lalmuanpuia chuan an tleirawl laiin MNF movement vanglai an tawn avangin Hindi mai bakah vai hrim hrim ngaihsan lohna avangin Hindi an thiam lova, a buaithlakin a inchhirawm hle a ti a, thangkhat lian lai India Hmarchhak zirlai pawl hruaitu ah a awm chhungin Hindi thiam loh avanga harsatna chu a tak ngeia tawktu a nih avangin, zirlai leh thangthar ten Hindi zir an uar chu a tul hle a ni a ti a. India ram rorelna sang Parliament ah pawh Mizote chuan Hindi thiam tak MP nei chho zel thei se, Mizoram pawhin kawng tam takah a chhawr tangkai a rin thu a sawi a ni.

India constitution chuan kum 1949 September ni 14 ah Hindi tawng chu Official language ah a pawm avangin kum 1953 atang khan kumtin September ni 14-ah Hindi Diwas lawm thin a ni a, kuminah Pathianni a nih avangin vawiin, September ni 15 hian hman a ni ta a ni.

<><><>

ADOPT A DUSTBIN

Mizoram UD&PA hmalakna hnuaia vantlang hmuna tlawmngaia bawlhhlawh bawm enkawl tur, Adopt a dustbin hnuaiah mi 50 chuangin bawlhhlawh bawm an enkawl mek.

Akashvani Aizawl zawhna chhangin UD&PA Director Pu Jacob Lalawmpuia chuan Adopt a dustbin hi Mizoramin faina kawnga hma a sawn theihna turin Mizoram UD&PA, Central YMA, AMC leh Smart City hmalakna hnuaiah kumin June Ni 5 World Environment Day khan bul an tan a ti a, Pu Jacoba chuan bawlhhlawh bawm hun ringawt a, vil zuitu an awm si loh chuan bawlhhlawh bawm hunna chhehvel chu a ti tawp zawk a ti a, hei vang hian vantlang hmunah te tlawmngaia bawlhhlawh bawm enkawl duh tur zawna atan Adopt a dustbin hi an siam a, bawlhhlawh bawm leh a hunna tur an pe thin tih sawiin, mi in an ngaihllu hle a ti a ni. Mizoram Florist Association, Taxi Welfare leh School thenkhat tiamin tun dinhmunah pawl leh mimal 50 chuangin bawlhhlawh bawm an adopt tawh a ti a, khaw chhung fai zawk a awm theih nan mipui te chu bawlhhlawh bawm adopt ve turin a sawm a, UD&PA website-ah online kaltlangin leh an office ah kalin bawlhhlawh bawm adopt hi a dil theih tih a sawi a ni.

Byte: UD&PA Director Pu Jacob

Pu Jacob-a chuan pawl, school leh mimal angin bawlhhlawh bawm hi a adopt theih a, chutihrualin remchang lo la a, mimal, school, leh office huamchhunga anmahni mawhphurhna ni sa ah chuan adopt an remti lova, vantlang hmun bawlhhlawh awm tam theihna, neitu awm lohna hmunah bawlhhlawh bawm adopt thei tur an zawng tih a sawi a ni.

<><><>

GST REFORMS

Tun thla ni 22 atanga GST rate thar hman GST nei sumdawngte chuan GST rate tlakhniamna bungraw man te an tihniam ve lo a nih chuan hrem theih an ni tih Commissionerate of State Tax, Deputy Commissioner Lalruatpuia chuan a sawi.

Akashvani Aizawl chuan sorkar laipuiin GST a siamthatna GST 2.0 chungchangah mithiam hrang hrang a kawm a, hetah hian State Tax Dy. Commissioner Pu Lalruatpuia chuan GST 2.0 hnuaia thil man tlahniam tur langsar zual zingah, cement, leh bawngnhnute te a tel tih sawiin, sorkar laipui chuan GST rate a tihdanglam tak avangin company te chu MRP thar neih a phalsak bawk a ti a. GST danah chuan Anti-Profiteering measures a awm tih sawiin, GST nei sumdawngte chuan GST rate tlakhniamna bungraw man te an tihniam ve lo a nih chuan hrem theih an a, September ni 22 atanga GST rate thar hman hunah rate tihhniam tawh, man to a la zuar hriate chu taxation office-ah hriattir turin mipuite a chah a, GST rate thar chuan sumdawngte leh sorkar ni lovin mipui nawlpui, leh loneitute hlawkna tur a ngaihtuah ber tih a sawi bawk a ni.

Byte: Lalruatpuia Dy. Commissioner, Commissionerate of State Tax

Pu Lalruatpuia chuan GST-a pawimawh ber chu Tax Invoice a ni tih sawiin, GST registration nei chuan a dawr chhungah thil leitute hmuh theih turin GST registration nei a ni tih a tar ngei ngei tur a ni a, cheng 200 man aia tam an bungraw leitute hnenah tax invoice an pe ngei ngei tur a ni tih sawiin, hei hi cash memo a ni lo a ti a, invoice-a chhiah pek mil thlapin tax department-ah chhiah a chhung ang a, tax department chuan an chhiah chhun luh leh a invoice pek chhuah hmangin a dik ngei tih an lo finfiah a ngai tawh dawn a ti a, hei hi sumdawngte leh a leituten ngaipawimawh nachang an hre thin lova, dan anga hrem kher ngai lovin mipuite chu hre turin a chah a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM MODI

Prime Minister Narendra Modia chuan vawiin khan Bihara Purnea district atangin hmasawnna project cheng vaibelchhe sing 4 man hu a hawng. Vawiina PM hawn zingah hian Purnea airport a tel a. He airport hi ramchhung hmundang nena Purnea inkalpawhna tur pawimawh tak a ni a. Hei bakah hian PM Modia hain National Makhana Board a hawng bawk a. Cheng vaibelchhe 6000 senna tur relkawng siamna tur a hawng bawk a ni.

<><><>

SEVA PARV

Mipui rawngbawl leh sawrkar inrelbawlna tha tih thupuia neiin Prime Minister Modia sawrkar chuan hmasawnna thlen turin theihtawp a chhuah a. Tun tum Seva Parv hunah chuan Modia sawrkarin Swachh Bharat Campaign hmanga mipui khawsak phungah hmasawnna a thlen te tarlang ila.

(Byte)

Swachh Bharat Abhyan kum 11 kalpui anih hnuin ramchhungah faina lama insiamthatna tam tak thlen a ni a. Inthiarna in la nei lo tan sak sak vek an nia . University of Callifornia leh Ohio State University te chuan an zirchiannaah kumtin mi sing 7 chaung thihna tur pumpelh anih thu an sawi.

<><><>

SUPREME COURT ON WAQF LAW

Supreme Court chuan Waqf dan thar dang rih tura khinna chu a hnawl a. Hetihlai hian Waqf Amendment Act danin a kentel thenkhat erawh chu hman rihloh turin a rel a. Chief Justice of India Justice B R Gavai leh Justice Augustine George Masih te chuan danin a kentel section te chu an ngaihtuah hnuah a dan pumpui hman rihlohna chhan tur an hmu lo tih an sawi a ni.

<><><>

GST

Prime Minister Narendra Modia'n kumin Independence Day lawmnah GST chhuan thar hman a nih tur thu a puang a. Hei hi tun thla ni 3 a GST Council thukhawm chuan a taka rawn ti puitlingin chhiah lak dan chhawng li ni thin chu chhawng hnihah titlemin awlsam zawkin a rawn siam danglam a. GST zaa 5, 12, 18 leh 28 a lak thin chu zaa 5 leh 18 ah tihhniam a ni a. Mi naran leh mi nawlpuite tana hlawkna thlen thei tur berin he GST hi siamrem a ni.

Sawrkarin GST rate thar a siamah hian zaa 12 atangin zaa 5 a lakna te hi mipui nitin mamawh leh mi naranten an lei nasat bungrua te a ni a. GST COuncil chuan pheikhawk cheng 2500 chin aia hniamah GST zaa 12 atangin zaa 5 in a tihniam a. Heng bakah hain thing, lung leh thir hmanga milem kerah te GST zaa 5 lak a ni a. Chartered Accountant leh taxation T Suresh chuan tuna GST dan thar hian ramchhungah a tha zawkin rah a chhuah dawn tih a sawi.

<><><>